

Su'esu'eina o aafiaga o le siosiomaga i Samoa e le Faamasinoga o Fanua ma Suafa*

Tu'u'u Ieti Taule'alo[†]

Faatomuaga

E tusa ma le valu sefulu pasene o fanua uma i Samoa e pulea faale-aganuu, e sefulu lua pasene o fanua o le Malo ae na o le fa pasene e pulea umia saoloto. O le faafoeina o mataupu uma e aafia ai fanua Samoa, e gafa ma le Faamasinoga o Fanua ma Suafa. Ona o fanua faale-aganuu e pulea e matai, ua faapena foi ona gafa le Faamasinoga ma mataupu uma e aafia ai suafa matai Samoa.

I lalo o le Tulafono o Fanua ma Suafa 1981, Fuaiupu 34 (2) ua tuuina ai i le Faamasinoga le puleaga faa-faamasinoga faapitoa -

- (i) i mataupu uma e faasino i igoa ma suafa tau Samoa;
- (ii) e faia ai poloaiga poo tautinoga e faatatau i igoa ma ni suafa tau Samoa e pei ona ua ono tatau ai ina ia puipuia ai po o e faamanoina ai ia lava mea, poo aia tatau po o avega tauave o loo faapipii i ia igoa ma suafa e tusa ai ma aganuu ma agaifanua a tagata Samoa ma tulafono uma o loo faamamaluina i totonu o Samoa i Sisifo e faasino i tu ma aganuu;
- (iii) i talosaga ma finauga uma i le va o tagata Samoa e faasino i fanua faale-aganuu ma le aia tatau ma le soloa'i atu i mea totino o loo umia e tusa ai ma aganuu ma agaifanua a tagata Samoa.

O le sini o lenei pepa e fia sailia pe iai se sao o le Faamasinoga i lalo o le tulafono na te soalaupule ai aafiaga o le siosiomaga i mataupu tau fanua ma suafa. E faaogaina ni tala o mea na tutupu e faapupula ai ni mataupu se lua sa fofogaina e le Faamasinoga – tasi e faasino i fanua ao le isi e aafia ai fanua ma suafa. O loo tau faamalalama po o a tonu vaega o le siosiomaga o loo aafia ai, ae aisea foi e tãua ai ma manaomia tele i le tausia faaauau o measina tau fanua ma suafa le faatino e le Faamasinoga o ni faaiuga talafeagai mo le puipuia o le siosiomaga.

Tala i le fanua o Legaoā i Tuana'i

O le tala o mea na tutupu muamua sa aafia ai le aiga o le tusitala i le afioaga i Tuana'i, na te umia ai le suafa Luafatasaga, ma o se finauga i le va o Luafatasaga ma le matai Leauvaa o Faatoafe. Mo le silafia o le afioaga o Leauvaa na sosola mai Savaii ina ua sasao le mauga mu i le 1905 na aafia ai le latou nuu ma eleele, ona o mai lea ave iai e le Malo le fanua e valu selau ma le fa eka e nonofo ai e tu i le i le va o Tuana'i ma Levī.

E pulea le fanua o Legaoā e le suafa Luafatasaga, ua leva tausaga talu ona faavae mai ae lē i taunuu mai tagata Leauvaa i Upolu. O lenei fanua e tū i gauta o Tuana'i i le tua'oi ma eleele na ave mo Leauvaa, pe tusa ma le lua kilomita mai tai i le aai. I lona amataga mai o le fanua atoa e tusa lona tele ma le luasefulu lima eka, tele pe ititi. Ona o le utiuti o fanua o Leauvaa o lea na ave ai e Luafatasaga i le tausaga e 1935 se vaega i sisifo o lona fanua e tua'oi ma Leauvaa, e galulue ai le aiga o Faatoafe i le itū i tai a'o le aiga o Pauga i le pito i uta.

* Assessment of environmental impacts in Samoa by the Lands and Titles Court

[†] Dr. Taule'alo o le Pulesili o le Matagaluega o Puanaoa Faanatura & Siosiomaga.

Ao le tulaga ua molimauina, ua matuā faaleagaina le tele o vaega o le fanua o Legaoā sa ave e faaoga e aiga Leauvaa. Poo le tausaga e 1980 na eli pū ai le vaega na tuu i le aiga o Pauga ae la'u e tanu ai le fanua o Tofamamao o le Ekalesia Katoliko. O le vaega o le fanua sa aafia e tusa ma le 20,000 sikuea mita, tele pe ititi, sa eli i le loloto e tusa ua to'a tumau ai le vai ma e le toe mafai ona toe faaoga.

Ao le amataga o le tausaga e 2004 na faataga ai e Faatoafe le isi matai faipisinisi o Leauvaa o Salā na te sua ma 'eli le vaega o Legaoā e sosoo ma le pito fanua na ave e galulue ai le aiga o Faatoafe. A fua i le tulaga ua iai vaega ua faaleaga e lē toe ola ni meatotō aua ua la'u uma palapala a luga ma maamaa ua tau i lalo i le papa. E ui ia sa tuuina mai e le Resitara o le Faamasinoga o Fanua ma Suafa se Polo'iga lē tumau e taofia ai le faaleagainga o le fanua ae sa faatino pea le galuega a Faatoafe ma Salā e toe taofi ane ina ua faaulu le talosaga a Luafatasaga ae pe tusa ma le 15,000 sikuea mita, tele pe ititi, o le fanua ua faatama'ia. I le taimi o le suesuega i luma o le Faamasinoga na molimauina e Faatoafe o lona talitonuga e pule Alii ma Faipule o le afioaga i Afega i le fanua, ma sa faatagaina e Alii ma Faipule le eliina o le fanua.

Sa talosagaina e Luafatasaga se finagalo o le Faamasinoga e faamaonia ai le:

- (a) pulea e Luafatasaga o le fanua o Legaoā;
- (e) tua'oi o Luafatasaga ma Faatoafe;
- (i) taofia o le Faatoafe ma Salā mai lo la toe sopo'ia, la'u o palapala ma maa pe faaleaga le fanua o Luafatasaga; ma le
- (o) poloaina o Faatoafe ma Salā e faalelei ma faatumu i palapala-a-luga vaega uma o le fanua ua ia eli, la'u ma faaleaga e toe faafo'i ai le fanua i le tulaga sa iai muamua; o lenei galuega toe faalelei ia faataunuu ma faamae'a i totonu o le taimi e tolu (3) masina, ma ia malie atoatoa iai le Luafatasaga i lona faatinoga.

I le faaiuga a le Faamasinoga i lenei mataupu na faamaonia ai vaega (a), (e) ma le (i) o le talosaga a Luafatasaga ae teena le vaega (o). E ui ina sa faamaonia e le Faamasinoga ua tele le afaina o le fanua ae o lona finagalo faaalua i le mafuaaga na teena ai le vaega (o) o le talosaga a Luafatasaga, ona e leai sana puleaga faa-faamasinoga i lalo o le tulafono e mafai ai ona poloaina Faatoafe ma Salā e toe faaleleia vaega o le fanua na la faaleaga.

Peitai e talitonu le tusitala o loo iai i le Faamasinoga le malosiaga i lalo o le Tulafono na te faia ai se poloaiga e toe faalelei le fanua aua ua tuuina iai le puleaga faapitoa i mataupu uma e aafia ai fanua ma suafa Samoa. I le faaliliuga o tulafono a Samoa e faaoga le faa-Peretania pe a faitau 'ese'ese - o le faaupuga faa-Peretania o le fuaiupu 34 (2) o le 'exclusive jurisdiction', e faaliliu faa-Samoa o le 'puleaga faito'atasi'. Peitai o le faaliliuga o loo tusia i le Tulafono o le 'puleaga faapitoa' e faaliliu o le 'special jurisdiction' ma e lē o ato'atoa ai le agaga o le Tulafono. O lona uiga tonu o le Tulafono e na o le Faamasinoga o Fanua ma Suafa o loo iai le puleaga na te soalaupuleina ai soo se matatupu e faasino i, pe aafia ai fanua faaleaganuu.

E tatau i le Faamasinoga ona amanaia ma faatino lana puleaga i lalo o le Tulafono na te faia ai faaiuga i soo se mataupu tau fanua faaleaganuu, e le gata i le pule o fanua ae aafia ai ma le faaogaina talafeagai o fanua, aua e leai se isi Faamasinoga e mafai ona silasila iai. Ae foliga mai ua tele se faaletonu o le faaiuga i lenei mataupu pe a fua i le Tulafono. O lona uiga e mafai i le lumana'i ona faaleaga e se tasi se fanua faaleaganuu o se isi e aunoa ma se mea e faia iai. Ua faigata foi ia Luafatasaga ona faatino lana pule i se vaega o lona fanua o Legaoā e

pei ona faamaonia aua o lea ua faatāma'ia ma faaleaga e Faatoafe ma Salā i le pule sesē a Alii ma Faipule o Afega, ma e lē mafai ona toe faaoga i se atina'e i le lumana'i.

Tala i le fanua o Malaesaili i Saanapu

E faasino le tala i mea na tutupu lona lua i le fanua o Malaesaili, o le Laoa faavae o le suafa Lesā i le afioaga o Saanapu, ma na aafia le tusitala i lenei mataupu ona o lona piitaga i le suafa Lesā. O le fanua o Malaesaili e tu i Saanapu-tai, ma ina ua toe foi ifo le aiga o Lesā i tai i le amataga o le tausaga e 2002, na iloa ai ua sopoia le tua'oi i sisifo o lona fanua e fale o le aiga o Tuigamala. Amata mai ai fefinauaiga i le va o Lesā ma Tuigamala ma tuuina atu ai le mataupu i luma o le Faamasinoga i le tausaga e 2005. E ui la o lenei mataupu e patino i le tuaoi i sisifo o Malaesaili sa finau ai, peitai e aafia tele ai ma faavae o Saanapu na soifua mai ai i ona suafa amata ae maise ona Maota ma Laoa tumau.

O faavae na soifua mai ai ulua'i suafa ma o latou Maota ma Laoa i Saanapu, o faavae ua uma ona tofi mai anamuā. E amata mai i le itu i sasa'e i le Maota i Logopese o le suafa Mati, sosoo mai ai le Maota i Tuugamau o le suafa Mulitalo, faasolo mai ai i le Laoa i Si'ua'i o le Igoāmatua ia Tuigaleava, sosoo ma le Laoa o Lesā i Malaesaili, sosoo ma le Maota i Poutalie o le suafa Tuiafelolo, sosoo ma le Maota i Falefuē o le suafa Leaanā; ae pito i sisifo le Maota i Pousigano o le suafa Anapu. Peitai o le suafa Tuigamala e leai sona Maota faavae i Saanapu aua e le o se matai faavae o Saanapu, ao le matai faavae o le afioaga o Fasitootai e iai lona faalupega o le Ma'opu o le Tuiaana. Sa faaalua i molimau o le faamasinoga, faatoā taunuu mai le suafa Tuigamala i Saanapu i le tausaga e 1900 ao pulea Samoa e le Malo Siamani, o lona uiga e oo mai ua leva ona soifua Maota ma Laoa faavae o Saanapu.

Ma o le mafuaaga lea o le talosaga ma le molimau maumaututū a Lesā, e tua'oi lona fanua o Malaesaili i le itu i sisifo ma le Maota o Poutalie o Tuiafelolo. Sa lagolagoina malosi e Tuiafelolo le tua'oi Poutalie ma Malaesaili ma molumauina lona faataga o Tuigamala na te nofoia se vaega o lona fanua i le tua'oi ma Malaesaili ina ua taunuu mai i Saanapu. E o gatusa lea finagalo pe a fua i le fasi fanua sa nofoia e le auaiga o Tuigamala - e lē pei o isi Maota ma Laoa faavae o Saanapu e iai o latou lumā, tafā ma tuā fanua, ae faalāumiumi mai tai i uta, e toetititi tu le umukuka o le isi aiga i luma o le fale o le isi. Peitai sa tuuina mai e Tuigamala i luma o le Faamasinoga e iai lona Maota e igoa o Lotomua e tu i le va o Malaesaili ma Poutalie.

O le faaiuga a le Faamasinoga i lenei mataupu na faamaonia ai e iai le fanua o Lotomua o le suafa Tuigamala, e tu i le va o Malaesaili ma Poutalie. O lona uiga ua suia ai i lenei faaiuga le faavae na soifua ma ai le afioaga aua e leai se Maota faavae o le suafa Tuigamala i le nofoaga o le aai tuai i Saanapu-tai. Sa manino i le taimi o le suesuega le finagalo o le Faamasinoga e faia se faaiuga e tau fai malilie uma iai itu ae maise ai le faasao o fale o le aiga o Tuigamala; a'o fale ia sa molimauina e Lesā ua sopo'ia mai lona fanua. Ae foliga mai o lea tulaga ua lē tusa ma aganuu ma agaifanua a Samoa e pei ona faatonuina i lalo o le Tulafono aua e faalagolago tua'oi o fanua faavae i faiga ma talafaasolopito na foafoa ma soifua mai ai ae le fuaina i le taufai faamalieina o itu faamasinoga.

E ui la o le autū o lenei suesuega o le tua'oi i sisifo o le fanua o Malaesaili peitai o lenei mataupu e aafia ai faavae ma le talafaasolopito o le nuu o Saanapu aua o lea ua lāga faavae o fanua tumau o le afioaga e pei o le Laoa i Malaesaili ma le Maota i Poutalie, ua faapena foi ona lāga ai ma faavae o suafa Lesā ma Tuiafelolo e ana fanua o loo finau ai. Ma e tatau foi ona suesue mae'ae'a le faavae o le suafa Tuigamala aua o lea ua faatu mai e iai lona Maota e igoa o Lotomua i Saanapu – pe na tupuga mai Tuigamala i Fasitootai, ao anafea foi na oo mai

ai i Saanapu? Ae lē talafeagai ona te'i ua vaevae se fanua faavae e pei o le Laoa i Malaesaili i ni faiga e faamalie ai itu faamasinoga, ae tatau ona sa'ili'ili lelei se faaiuga talafegai e o gatusa ma aganuu ma agaifanua na soifua mai ai nei fanua ae maise suafa o loo aafia ai.

Manatu faaalua

Ua faamatala i luga ni tala i ni mea na tutupu e tau faamalamalama ai pe mafai e le Faamasinoga o Fanua ma suafa ona suesueina aafiaga o le siosiomaga, a'o a foi mataupu e aofia ai. Muamua o loo manino i le Tulafono e iai i le Faamasinoga le puleaga faito'atasi na te su'esu'eina ai ma faia faaiuga i soo se mataupu e aafia ai suafa ma fanua tau Samoa. O lona uiga e le gata i vaega masani e pei o le pule ma le faaaogaina o suafa ma fanua, ae aofia ai foi ma isi tulaga e pei o aafiaga o le siosiomaga

I lalo o le Fuaiupu 34(2) o le Tulafono, ua tuuina ai i le Faamasinoga le puleaga faito'atasi faa-faamasinoga mo suafa ma fanua faale-aganuu. Ua tolaulau ai ma nisi o mataupu e aofia i lea puleaga a le Faamasinoga e pei o le puipuia, faamanoinoa, aia tatau ma avega tauave e faatatau i suafa; a'o aia tatau e soloa'i atu ai i fanua. O loo manaomia foi le Faamasinoga ina ia faatino lana puleaga e tusa ai ma aganuu ma agaifanua a Samoa.

Ua faatāua i Samoa le puipuia o ana measina e pei o tu ma agaifanua ma le olaga faa-Samoa, ma o Samoa o se tasi o sui auai o le Feagaiga faava o Malo mo le Puipuia Measina i le Lalolagi. A silasila i nisi o manaoga o le Tulafono ua tā'ua i luga e o gatasi lelei ma le agaga tonu o le "atina'e gafataulimaina" o measina. Ua faatāua mataupu mo le pulea lelei ma le faaoga faaaau e pei o puipuiga ma aia tatau. O loo malamalama lelei foi le siosiomaga e tatau ona faatino ai nei manaoga o le Tulafono - ia tusa ma aganuu ma agaifanua a Samoa.

Ae faigata tele ona ausia nei matafaioi pe a faia e le Faamasinoga ni faaiuga e afaina ai pe faafaigata ona faatino manaoga o le Tulafono. A silasila i le Tala i le fanua o Legaoā, e lē mafai ona fia pulea e se tasi pe soloa'i faasolo atu i se fanua ua ta'eli ma la'u'ese maamaa ma palapala a luga ua lē toe aoga i se atina'e. Ao le Tala i le fanua i Malaesaili e lē ona tuu eseese le faavae o le suafa Lesa, Tuiafelolo poo Tuigamala ma nofoaga faavae o nei suafa. Ma e le tatau ona vaevaeina Maota ma Laoa e faamalie ai se tasi aua o fanua ua uma ona tofi, e tatau ona sailiili lelei i le moni e tusa ai ma tu ma aganuu mamalu a Samoa.

Upu faai'u

E talitonu le tusitala e mafai e le Faamasinoga o Fanua ma Suafa ona ia faia suesuega ma faaiuga e uiga i aafiaga o le siosiomaga aua ua iai i le Faamasinoga le puleaga faapitoa ma le faito'atasi mo fanua ma suafa tau Samoa. O lona uiga e tele le sao o le Faamasinoga i le atina'e gafataulimaina o fanua ma suafa, e lagolagoina ai le pulea lelei ma le faaaogaina talafeagai o nei measina a le atunuu mo tupulaga nei ma taeao.